



ФРАНЦУЗ РОМАНТИЗМИНИНГ ШАКЛЛАНИШИГА ШАРЛЬ НОДЬЕ ИЖОДИНИНГ ТАЪСИРИ

Қаршибаева Улжан,

Самарқанд давлат тиббиёт институти фил.ф.д.

Калим сўзлар: романтизм, монархияпарастлик, классицизм, адабий танқид, роялист, инквизиция, индульгенция.

Атоқли адабиётшунос Л.Г. Андреев ҳам Шарль-Огюстен де Сент-Бёвнинг француз романтизми бошловчилари Ф.Шатобриан ва Жермена де Сталь деган фикрни эътироф қиласар экан, бу даврда Францияда адабий ва ижтимоий-сиёсий жараёнлар жуда мураккаб эканлигини кўрсатади [Андреев 1979: 331-332]. Сент-Бёв ёзганидай, француз романтизми Шатобриан ва Жермена де Сталь ижоди ва эстетик қарашларида ифодасини топган икки хил йўлдан борган эди. Биро Ф.Шатобриан эстетик қарашлари ифодаланган “Христианлик даҳоси”да айтган монархияпарастлик ва художўйликни ҳимоя қилувчи руҳоний романтизм, иккинчиси- буюк француз революцияси ғоялари, гуманизм ва шахс эркинлиги, ижтимоий тенглик, ҳалқпарварлик идеаллари учун курашувчи революцион романтизм вужудга келиб шаклана бошлади. Революцион романтизм атамаси ва тушунчаси француз романтизмининг етакчи хусусиятларидан эди.

Француз романтизми ижодни чекловчи классицизмга қарши курашган бўлса ҳам Шекспир, Жон Мильтонлар ижодидан, антик адабиётдан руҳланган классицистлар Пьер Корнель, Жак Расин ижодидан ҳам баҳра олар эдилар.

Бизнинг фикримизча, француз романтизми етакчиларидан учинчиси – бадиий ва илмий асарларида антик адабиёт хазиналарини, “эски”, “қадимги” китобларни чуқур ўрганишга чақирган Шарль Нодье эди. У жонкуяр китобсевар-баблиофил сифатида француз революцияси (1789-1794), Наполеон империяси ва унинг ағдарилиши йилларида катл этилган ёки эмиграцияга

кочган аристократлар, дворянларнинг кутубхоналаридан кўчага улоқтирилган, ажойиб, нақшин, зарҳал муқовали нодир китобларни ўқолишдан сақлаб, сотиб олиб, библиография тузиб, уларни ўқишига даъват қилган. Тадқиқотчилар ёзишича Ф.Рабле ва Сирено де Бержерок, Данте, Тассо, Петрарка асарларининг нодир нусхаларини Ш.Нодье топиб, асрар, ёш авлодларга етказган [Нодье 1989: 22].

Романтик адаб сифатида Ш.Нодье “Күвфидилар” (“Изгнанники”), “Зальцбургли рассом”, “Адель”, “Жан Сбогар” романларида Ф.Шатобриан изидан бормади ва гуманизм, бадиият жиҳатидан уни орқада қолдирди. У адабий давраларда ёш В.Гюгони қўллаб-куватлади.

В.Гюгонинг адаб сифатида шаклланишида безансонлик адвокат ўғли, вундеркинд, серқирра истеъдод соҳиби (ботаника, топонимика, лингвистика, энтомология-ҳашаротшунослик, адабий танқидчи) бўлган Шарль Нодье етакчилигига “Арсенал” кутубхонасида ташкил этилган адабий давранинг ҳам таъсири муҳим аҳамиятга эга. Буюк француз революцияси бошланганида (1789, Бастилияning олиниши) Шарль Нодье 9 ёшда эди. У 12 ёшида Безансондаги “Конституция дўстлари жамияти” мажлисларида қизғин революцион нутқлари билан ҳаммани ҳайратга солган эди. 1802 йилда Ш.Нодье Парижга келиб, ёш романтиклар тузган “Антик донишмандлар”га қўшилди. В.Гюгонинг “Тўқсон учинчи йил” романида ҳаққоний тасвирланган роялистлар-қиролпарастларнинг ҳам, инқилобчиларнинг ҳам фанатизми, шавқатсизлигини, бу курашларда ҳар икки



томондан юз минглаб одамларнинг ўлдирилиши ва қувғин қилинишини Ш.Нодье ўз кўзи билан кўради. Ўзи ҳам Наполеон консуллиги даврида, 21 ёшида унинг жабр зулмини, босқинчилигини танқид қилиб ода ёзади, сиёсий исёнкор сифатида Франциядан қочиб, Швейцарияда, Юра тоғларида, Илларияда (хоз. Босния, Черногория) қувғинда яшайди.

Шарль Нодье ёшлигига ёзган романтизм руҳидаги асосий бадиий асарлари “Стелла ёхуд қувғиндилар” (1802), “Зальцбурглик рассом” (1803), романларида оиласидан, ватанидан узокда, ёлғизлиқда яшаётган гўзал қалбли, илгор фикрли инсонларнинг орзу –армонларини, фожиали қисматларини тасвирлайди.

Ш.Нодьенинг “Қувғиндилар” романи сарлавҳасида ўзига устоз деб билган Ф.Шатобрианнинг “Жафокашлар” романига ўхшашлик кўринади. Ф.Шатобриан (1768-1848) 1789 йилги буюк француз революцияси оқибатида қирол тарафдорлари қаторида оиласи билан сургун қилинади, қувғинда яшайди. У христианлик диний эътиқодига содик бўлса-да инквизицияга, индульгенцияга, рохиблар, епископларнинг текинхўрлигига қарши эди. У Ж.Руссо асарлари таъсирида ёзган “Ўтмишдаги ва ҳозирги революциялар тажрибаси” (“Опыт”) асарида ўзининг қандай шахс эканлигини, ички дунёсини тадқиқ этади. Шу билан бирга у якка шахснинг революция давридаги ҳис-туйғулари, кечинмалари, бошига тушган фалокатларни, қайғуларни ҳам таҳлил этади. Ш.Нодье ҳам “Қувғиндилар” романида якка шахснинг ҳис-туйғуларини, кечинмаларини тасвирлайди.

Россия адабиётшуноси Д.Д.Обломиевский “Француз адабиёти тарихи” китобининг “1830 йилгача француз романтизми” бобида ёзишича, Ш.Нодье болалик ва ўсмирлик йилларидан бевосита революция қатнашчилари даврасида яшаб, бу воқеаларни ўз кўзи билан кўрди. Унинг отаси республика тузуми вақтида (1789-1795) революцион

хукуматда, Безансон революцион суди (трибунали)нинг раиси эди. Ш.Нодье ёшлик йиллари инқлобий нутқлари билан монархия деспотиясига, теранияга қарши чиқишлар қилган бўлса-да, революция терорига ҳам, монархиячилар терори қатагонларига ҳам қарши эди. У 13 ёшида бир дворян аёлни революцион трибуналнинг ўлим жазосидан сақлаб қолади. У отасига қатъий талаб қўйиб, Рейндаги қирол армиясида хизмат қилаётган қариндошига ёрдам бериб, пул юборгани учун хибсга олинган аёлни ўлимга ҳукм этсангиз, мен ҳам ўзимни ўлдираман, дейди. Ўғлининг ўжарлигини, инсонпарварлигини билган ота унинг илтимосини бажаришга мажбур бўлади. Ш.Нодье Страсбургда ўқиган вақтларида инқилобчи судья Элензий Шнейдернинг уйида яшаган вақтида, унинг ҳукми билан жуда кўп монархиячилар қатл этилганини, реставрация йилларида эса қирол тарафдорлари уни қатл этганини кўради [Брандес Том-9:213].

Адабиётшунос Г.Брандес 1896 йилда рус тилида нашр этилган Ш.Нодье асарларининг 9-томида, сўзбошида ёзишича, романтик шоир, адаб 1802 йилда Парижга келиб, Наполеон I-консул бўлган директория вақтида унинг деспотиясига қарши ода ёзгани учун, кўп айбиз одамлар қамоққа олинганида, уларни озод қилиш учун одани ўзи ёзганлигини ички ишлар министри Фушега хат ёзиб маълум қилган. Айбиз одамлар озод қилиниб, Ш.Нодье бир ойдан зиёд қамоқда сакланган. Отаси таниш-билишлари орқали елиб-югуриб, уни Безансонга сургун қилинишига эришган. У, 1805 йилда полиция назоратида бўлса ҳам, Юра тоғида (Швейцарияда) императорга сунқасд қилувчилар даврасига қўшилган. Фитна фош этилиб, баъзилар ўлимга, баъзилар сургунга ҳукм қилинган. Шундан сўнг ёш шоир тиранлар таъкибидан кечиб, 1830 йил инқилобига қадар, 25 йил давомида Франциядан узокда, қувғинди бўлиб яшаган. Ва ўша йиллари романтик руҳдаги энг яхши асарларини ёзган.



Ш.Нодъенинг “Кувгиндилар” романида инсонпарварлик, бахтсизларга ҳамдардлик, севги ва дўстлик табиий фазилатлар сифатида тасвиранади. Асар сюжети поэтикасида лиризм ёлғиз инсоннинг руҳий кечинмалари, ёлғиз қолган одам дўстликнинг қадрига етиши, шахс озодлиги энг қимматли бойлик эканлиги, нафис ва гўзал тил муҳим ўрин эгаллади. Асар қаҳрамонлари бахтсизликка учраган бўлса ҳам Худодан, тақдирдан қочмаслик кераклиги ҳақидаги фикрлари муаллифни Ф.Шатобрианнинг “Христианлик даҳоси” ғояларига ҳамоҳанг кўринса-да, Ш.Нодье қаҳрамонлари “Рене” ва “Атала” қаҳрамонларига сира ўхшамайди. Бу икки ижодкор ўртасидаги муҳим фарқ шундаки, Ф.Шатобриан қаҳрамонлари психоанализда фақат шахсий ҳис-туйғуларига, ички, руҳий кечинмаларига ғарқ бўлсалар, Ш.Нодье “Кувгиндилар”, “Зальцбургли рассом”, “Адель” романларида, “Мадмуазель Марсан” қиссасида қаҳрамонлар ҳаёт йўлида учраган ўзи каби бахтсизларнинг қайғуларига ҳамдард бўлиб, уларнинг гўзал инсоний фазилатларидан завқланади, бу қаҳрамонлар фожеаларни, фалокатларни ҳам мардона кутиб оладилар ва ўзларининг виждан соғлигини, орномусини, олижаноблигини сақлаб қоладилар [Нодье 1993:16]. Бу қаҳрамонлар руҳиятидаги романтизм сиёсатга, ижтимоий лаҳзаларга ҳам бегона эмас. “Кувгиндилар” романи қаҳрамони назарида “Революциялар табиий ҳол, улар инсон касаллиги каби соғайиши учун маълум вақт ўтиши зарур, шунда инсоният дардан кутилиб, покланади, революциялар тарихи кейинги авлодлар учун сабоқ берувчи мактаб бўлиб қолади” [Нодье 1993:22]. Адид ватанидан, ота-онаси, ака-укалари, опа-сингилларидан, дўстларидан айрилиб, бегона жойларда яшаётган одамни кимсасиз оролда қолган ёлғиз одамга ўхшатади.

“Кувгиндилар” романида Франциядан қувғин килинган уч қаҳрамон: биринчи шахс-хикоячи, ақлдан озган, телба бўлиб қолган олижаноб йигит Лавли

ва тиранияга қарши қурашган, инқилобчи йигитнинг севимли хотини Стелла муносабатлари ва руҳий кечинмалари муфассал тасвиранади. Асар сюжети поэтикасида сирлилик муҳим ўрин эгаллади. Ҳикоячи (бош қаҳрамон) романтик табиатли рассом қизни қаттиқ севиб қолади. Аёл унинг севгисидан ўзини баҳтли ҳис қиласди. Бу икки ёш висол чоғлари табиат гўзаликлари фонида ўзларини баҳтли ҳис этадилар.

Аммо, Стелла ўзини бу баҳтга нолойиқ деб билади. Вижданан азобланади ва бу севгисини жиноят деб, ўзини ҳалок этади. У ўлими олдидан ўзини қийнаган сирни очади: Стелланинг севгилиси иккита бўлиб чиқади. Қизнинг ота-онаси, аслзода оила вакиллари эди. Улар қизни севган йигитига турмушга берадилар. Бу йигит золимларни таҳтдан ағдариш учун қурашда жонини фидо қиласди. У ўлими олдидан Стелладан “Менга бўлган муҳаббатингни асрар!” деб тилагини айтади. Стелла “Асрайман” деб ваъда беради, аммо асролмайди. Ўзини қаттиқ севиб қолган иккинчи қувғинди йигитнинг севгисини рад этолмайди. Бош қаҳрамон Стелланинг христианлик диний бурчини бажаролмай, азоб чекишлари бу асарни Ф.Шатобриан “Рене”сига яқинлаштиради. Бу ерда ҳам, у ерда ҳам “жиноий севги” қораланади. Асар қаҳрамонлари яна И.В.Гётенинг бутун Европада, шу жумладан, Францияда ҳам катта шуҳрат қозонган “Вертер”ини эслатадилар. Ш.Нодье буни асарида очик айтади. Асарда ҳикоячи-қаҳрамон ҳам, Стелла ҳам “Вертер” романини ўқиб, шу ҳақда муҳокама қиласдилар.

Севги учлиги жуда кўп адиларнинг асарларида (аввало Жан Жак Руссонинг “Янги Элоиза” романида) тасвиранган бўлса-да, романтизм руҳи, драматизм кескинлиги, қаҳрамон изтиробларининг теранлиги жиҳатидан Гётенинг “Вертер”и ҳамда Ш.Нодъенинг “Кувгиндилар”, “Зальцбургли рассом”, “Адель”, “Жан Сбогар” романлари бадий юксаклиги билан ажралиб туради.



Ш.Нодье монархиячилар, қиролпарастлар, тиранлар таъқибидан қочиб, Юра тоғларида, дарбадар юрган соғларида күрган ажойиб—гаройиб табиат манзараларини “Peintre de Salzbourg”—“Зальцбургли рассом” романида истеъдодли рассомдай тиник, равшан тасвиirlайди. Бу романда Ш.Нодье кундалик дафтар ёзувлари услубидан фойдаланади. Биринчи шахс номидан “мен” деб ҳикоя қилиш, қаҳрамон рухий кечинмаларини, ҳис-туйфулар оламини тасвирлаш, лиризм ва драматизм ҳолатлари романтизм адабиётида муҳим хусусиятлар эканлигини билдиради. Асарда бош қаҳрамон-рассомнинг ватанидан, оиласидан, дўстларидан, жамиятдаги обрў-иззатидан айрилиб, жиноятчидай қочиб юриши бош қаҳрамоннинг азобларини, қайғу-хасратларини кучайтиради. Бош қаҳрамон чексиз қайғулари орасида севгилиси Элалининг вафосизлик қилиб, бошқага турмушга чиқиб кетиши уни ақлдан оздиришига оз қолади. Бу гал роман бош қаҳрамони француз эмас, бавариялик рассом Шарль ёки Карл Мюнцер бўлиб, унинг тақдирни, табиат ажойиботлари, чеккан азоблари, қайғулари софдил ўқувчилар қалбини ларзага солади.

Умуман олганда Ш.Нодье асарларида гуманизм билан яқин бўлган, ижобий маънодаги сентиментализм руҳи устунлик қилади. Асар қаҳрамонларининг баҳтсизлиги, деспотлар, тиранлар, қиролпараст золимларнинг дастидан ватанидан, яқинларидан айрилиб, азоб чекаётганлигини таъсирchan поэтик бўёқларда тасвиirlаш француз романтизмида муҳим ўрин тутади. “Зальцбургли рассом” романни бош қаҳрамони, қувфинди Карл Мюнцернинг севгилиси исми Элали деб аталиши, Юра тоғларининг тик қоялари, даралар ичидаги дарёларнинг асов шаршаралари, абадий музликлар, яшин-чақинларнинг оловли излари, ёввойи табиат манзаралари ҳам Ж.Ж.Руссонинг “Янги Элоиза” романни қаҳрамонларини эслатади. Ш.Нодье бу романнда ҳам бош қаҳрамон-Зальцбургли

кувгинди рассомнинг севгилиси билан баҳтли учрашувлари, беғубор севги лаззатлари, асар охирида қаҳрамон севгилисидан айрилиб, яна ёлғиз қолиши, қизнинг рассомни ўлди деб ҳабар эшитгандаги изтироблари тасвири, яна бир фожей севги, никоҳ куни вафот қилган олижаноб қиз Корделиянинг дафн маросими вақтида яна бир олижаноб, гўзал йигитнинг келиб қолиши, бу маросимни кўриб, ҳушидан кетиши, Зальцбургли рассом уни ҳушига келтириб, уйига элтиши, у билан яқин дўст бўлиб қолиши, кейин билишича, бу ажойиб йигит рассомнинг севгилиси Элалининг эри Вильгельм бўлиб чиқиши, рассом бу ракибини душман деб билмай, унга ҳамдардлик билдириши, иккала дўст бир аёлни севганини ҳам табиий ҳол деб билишлари, тоғ қишлоғидаги дехқонлар, ёшларнинг байрам қилиб, ракс тушиб, қўшиқ айтишлари, буларнинг камтарона баҳтли ҳаёти, рассом йигит ўлиб кетган севгилиси билан учрашувларини, ширин сухбатларини эслashi, яна ёлғиз қолганида муқаддас китоб Библиянинг қадимги Аҳу қисми Таврат ривоятлари, Сулаймон пайғамбар, Юсуф, Даниэл, Руфъ, Иеремия қиссаларидан тасалли топиши тасвиirlанди. Асар хотимасида Элали бу икки ошиқдан бирортасига турмушга чиқмай, у дунёга бегуноҳ кетиш учун монастирда сочини кестириб, роҳибага айланиши, Зальцбургли рассом ақлдан озиб, дарё тошқинида ўзини ҳалок қилиши, дўсти Вильгельм уни кафандаб, кўмиш учун монастир қабристонига олиб бориши, роҳиблар уни ўз жонига қасд қилгани учун дафнга рухсат бермагани, Вильгельм дўсти Зальцбургли рассомнинг жасадини Дунай дарёсидаги ороллардан бирига дафн этгани, қабри устига катта тош қўйиб, марҳумнинг исмини ёзиб қўйгани, кейинги йили дарё тошиб, тошни ҳам, қабрни ҳам оқизиб кетгани ҳикоя қилинади [Нодье 1993:86-91]. Бу асарда олижаноб, олий ҳиммат, софдил инсонларнинг Франциядан кувилиб, ғурбатда ғарибликда чеккан азоблари ёркин тасвиirlангани билан шуҳрат



қозонди. Асар сюжетининг ўткирлиги, мазмуни, гуманистик нафаси билан кичик ҳамда юксак, умуминсоний француз адабиётида муносиб ўрин олди.

Адабиётлар:

1. Андреев Л.Г.. Французская литература // История зарубежной литературы XIX в. Том I, М.Изд.МГУ, 1979, стр.331-332.
2. Брандес Г. Романтическая школа во Франции. Ш.Нодье. Собрание сочинений . СПб, «Просвещение», Т-9, с.213.
3. Нодье Ш. Живописец из Зальцбурга. // Ш.Нодье. Любовь и магия. Т. “Шарк”, 1993, с.86-91.
4. Нодье Ш. Изгнанники. // Сб. Ш.Нодье. Любовь и магия. Т. “Шарк”, 1993, с.16.
5. Нодье Ш. Читайте старые книги. М.Изд. «Книга»,1989,стр.22.

Karchibaeva U. Influence creative activity Charles Nodier on shaping the French romanticism. Influence creative activity Charles Nodier is researched in article on literature of the French romanticism, his skill, interaction romantic genre and spiritual romantic hero.

Каршибаева У. Влияние творчества Шарля Нодье на формирование французского романтизма. В статье исследуется влияние творчества Шарля Нодье на литературу французского романтизма, его мастерство, взаимодействие романтического жанра и духовность романтического героя.
